

11 MAR 2000

Mahathir-Raya

RUMAH TERBUKA AIDIL ADHA PERDANA MENTERI DI JITRA

ALOR SETAR, 11 Mac (Bernama) -- Perdana Menteri Datuk Seri Dr Mahathir Mohamad akan mengadakan Rumah Terbuka pada Hari Raya Aidil Adha, Khamis ini, di Dewan Jitra, dekat sini.

Wakil Peribadi Dr Mahathir di Parlimen Kubang Pasu, Tan Sri Osman Aroff, hari ini berkata rumah terbuka itu diadakan dari 10.30 pagi hingga 4 petang.

Dr Mahathir, yang juga anggota Parlimen Kubang Pasu dan isteri Datin Seri Dr Siti Hasmah Mohd Ali, akan berada di Kedah selama tiga hari mulai 15 Mac.

Perdana Menteri dijadual mendengar taklimat pembangunan negeri oleh Menteri Besar Datuk Seri Syed Razak Syed Zain di Lapangan Terbang Sultan Abdul Halim, dekat sini, setibanya di lapangan terbang itu pada pukul 3.15 petang, Rabu ini.

Kemudian, Dr Mahathir akan menyerahkan lembu-lembu korban di Taman Mahsuri, Bandar Darul Aman, di Masjid Kampung Lembah Palas, Changlun dan di kediaman rasminya di Titi Gajah, dekat sini.

Osman berkata Perdana Menteri akan menunaikan solat sunat Aidil Adha di Masjid Akar Peluru, Jalan Pegawai di sini sebelum mengadakan rumah terbuka itu.

Mengikut aturcara, Dr Mahathir dan isteri akan menghadiri majlis sambutan Hari Raya Aidil Adha bersama-sama penduduk di Masjid Paya Sena, Pendang pada pukul 10.30 pagi Jumaat ini, kata Osman.

Dr Mahathir kemudian akan menyertai penduduk di situ menunaikan sembahyang Jumaat di masjid itu sebelum berlepas pulang ke ibu negara pada sebelah petang.

-- BERNAMA

JM NAK